

Nawaitu perlu kuat dalam mencapai kesempurnaan hidup

Berita dan Foto : Haji Ariffin Mohamad Noor / Morshidi

BANDAR SERI BEGAWAN, Ahad, 8 April. - Setiap manusia itu semestinya mempunyai matlamat kehidupan di dalam mencapai kesempurnaan hidup di bumi Allah ini dan matlamat itu tidak akan tercapai tanpa adanya keazaman untuk berjaya.

Keazaman ini adalah makna daripada pengertian niat yang mempengaruhi segala tindakan-tindakan yang dilakukan, sama ada untuk mencapai kesenangan di dunia mahupun di akhirat maka niat itu memainkan peranan penting untuk menghasilkan sistem pelaksanaan yang teratur.

Perkara tersebut merupakan antara perincian yang dikongsikan pada Tazkirah 'Subuh bertajuk 'Kekuatan Nawaitu' yang disampaikan oleh Pengarah Pusat Perhubungan Awam dan Antarabangsa, Universiti Islam Sultan Sharif Ali (UNISSA), Awang Haji Sammali bin Haji Adam di Masjid Omar 'Ali Saifuddin, di sini.

Tambah Awang Haji Sammali lagi, hala tuju ke arah kesempurnaan matlamat kehidupan itu tidak akan berjaya, tanpa adanya restu daripada Allah melalui niat yang ikhlas dan keberhasilan sesuatu bidang atau tugas yang dilakukan dengan keikhlasan akan menahirkan rasa keterbukaan, tidak terkongkong, malah akan terus menambahkan dalam segala tindak-tanduk yang diusahakan.

Jelas beliau, inilah bukti bahawa nawaitu kita perlu kuat untuk mencapai kesempurnaan hidup.



MENTERI di Jabatan Perdana Menteri, Yang Berhormat Dato Seri Paduka Awang Haji Abdul Mokti bin Haji Mohd. Daud (tiga, kiri) semasa hadir bersama jemaah mendengarkan Tazkirah Subuh bertajuk 'Kekuatan Nawaitu' yang disampaikan oleh Pengarah Pusat Perhubungan Awam dan Antarabangsa, UNISSA, Awang Haji Sammali bin Haji Adam.

Juga hadir bersama para jemaah masjid bagi menjayakan program tersebut ialah Menteri di Jabatan Perdana Menteri, Yang Berhormat Dato Seri Paduka Awang Haji Abdul Mokti bin Haji Mohd. Daud; Timbalan Menteri Hal Ehwal Ugama, Yang Mulia Pengiran Dato Seri Paduka Haji Bahrom bin Pengiran Haji Bahar; Setiausaha Tetap Kementerian Hal Ehwal Ugama, Dato Seri Setia Awang Haji Abdul Aziz bin Orang Kaya Maharaja Lela Haji Yussof serta Timbalan-Timbalan Setiausaha Tetap KHEU, Awang Roslan bin Haji Taja'ah dan Awang Haji Mohd. Scrudin bin

Haji Timbang.

Turut sama menyerikan program ini ialah Pjebat Timbalan Menteri, Jabatan Hal Ehwal Masjid, Bahagian Bangunan dan Pemeliharaan, Bahagian Perhubungan Awam, Jabatan Hal Ehwal Syariah, Bahagian Pendakwaan Syariah dan Bahagian Penguatkuasa Ugama, KHEU.

Kehadiran jemaah memakmurkan rumah Allah diharapkan akan dapat menghidupkan amalan sunnah Baginda Rasulullah Sallallahu Alaihi Wasallam dan dapat menimbulkan rasa persamaan

di antara umat Islam dalam melaksanakan sembahyang berjemaah dan amal ibadat bersama-sama.

Program Masjidku Makmur, Negara Berkat merupakan sebuah program dalam sama-sama

mengalu-alukan jemaah bagi memakmurkan masjid dan seterusnya secara istiqamah (bertcrusan) mendirikan Sembahyang Fardu Subuh secara berjemaah pada awal waktu di masjid.

Pendidikan Sultan Muhammad Al-Fateh boleh dipraktikkan

Oleh : Haniza Abdul Latif
Foto : Hamzah Mohidin

BANDAR SERI BEGAWAN, Ahad, 8 April. - Bagi melahirkan anak-anak generasi Islam bersifat seperti Sultan Muhammad Al-Fateh, Belia Masjid Ash-Shaliheen menganjurkan forum bertajuk 'Program Pendidikan Anak : Siri 1 - Al-Fateh Parenting' bertempat di Masjid Ash-Shaliheen, di sini.

Forum tersebut dipengerusikan oleh Ahli Belia Masjid Ash-Shaliheen, Awang Md. Danial bin Ramadan.

Manakala itu, ahli-ahli panel terdiri daripada Pensyarah Fakulti Syariah dan Undang-undang di Universiti Islam Sultan Sharif Ali (UNISSA), Dr. Widad binti Abd. Aziz yang juga selaku Pengasas Bersama Tadabbur & Seerah for Kids serta Pengasas dan Ketua Eksekutif Syarikat MuBn Learning & Growth, Dr. Hajah Mona Yati binti Dato Seri Laila Jasa Haji Mohd. Kassim juga penceramah kelulusan Majlis

Ugama Islam Brunei (MUIB), Awang Haji Abd. Rahman bin Haji Nawil.

Para ahli panel antara lain menjelaskan, tentang bagaimana cara pendidikan Sultan Muhammad Al-Fateh boleh dipraktikkan oleh ibu bapa pada masa ini untuk anak-anak mereka, iaitu dengan mendidik anak-anak supaya mencernakan dan menjadikan Al-Quran sebagai teman dari sejak mereka kecil lagi.

Forum yang diadakan buat julung-julung kali itu bertujuan untuk memahami faktor kejayaan Sultan Muhammad Al-Fateh agar dapat diaplikasikan dalam pendidikan anak dari sudut ilmu, akhlak dan sumbangan baginda terhadap Islam.

Selain itu, ia juga bagi menerapkan nilai-nilai pendidikan Islam dalam kalangan ibu bapa selaku pendidikan awal dalam keluarga.



AHLI-ahli panel terdiri daripada Pensyarah Fakulti Syariah dan Undang-undang di Universiti Islam Sultan Sharif Ali, Dr. Widad binti Abd. Aziz yang juga selaku Pengasas Bersama Tadabbur & Seerah for Kids (dua, kiri); Pengasas dan Ketua Eksekutif Syarikat MuBn Learning & Growth, Dr. Hajah Mona Yati binti Dato Seri Laila Jasa Haji Mohd. Kassim (kiri) dan penceramah kelulusan Majlis Ugama Islam Brunei, Awang Haji Abd. Rahman bin Haji Nawil (dua, kanan).

Menteri di JPM terima kunjungan hormat



MENTERI di Jabatan Perdana Menteri, Yang Berhormat Dato Seri Paduka Awang Haji Abdul Mokti bin Haji Mohd. Daud semasa menerima kunjungan hormat daripada Pesuruhjaya Tinggi British ke Negara Brunei Darussalam, Tuan Yang Terutama Richard Stephen Lindsay.

BANDAR SERI BEGAWAN, Ahad, 8 April. - Menteri di Jabatan Perdana Menteri (JPM), Yang Berhormat Dato Seri Paduka Awang Haji Abdul Mokti bin Haji Mohd. Daud menerima kunjungan hormat daripada Pesuruhjaya Tinggi British ke Negara Brunei Darussalam, Tuan Yang Terutama Richard Stephen Lindsay pada 5 April lalu.

Pada kunjungan hormat tersebut, Yang Berhormat Menteri di JPM

Siaran Akhbar dan Foto :
Jabatan Perdana Menteri

dan Tuan Yang Terutama Pesuruhjaya Tinggi British ke Negara Brunei Darussalam berbincang mengenai kerjasama dua hala di antara Negara Brunei Darussalam dan United Kingdom termasuk dalam bidang keselamatan.

Hadir semasa perjumpaan

tersebut ialah Setiausaha Tetap di JPM, Letenan Kolonel (B) Pengiran Haji Muhammad Szalil bin Pengiran Haji Yakob dan Pengarah Jabatan Keselamatan Dalam Negeri.

Perjumpaan tersebut berlangsung di Pejabat Menteri di JPM, Bangunan JPM.